

四庫全書

集部

欽定四庫全書

集部
併摺集
目錄
卷五
五

詳校官左中允_臣璫五珠

主事_臣呂雲棟覆勘

覆校官中書_臣汪師曾

校對官助教_臣胡予襄

謄錄舉人_臣吳之承

欽定四庫全書

集部四

柝欄集

別集類三 宋

提要

臣等謹案柝欄集十六卷宋鄧肅撰按王明清揮麈後錄稱宣和壬寅艮岳成徽宗御製記李質曹組各獻賦獨太學生鄧肅上十詩備述花石之事其末句云但願君王安萬姓園中何日不春風詔屏逐之靖康初李伯紀

啟其事薦其才召對賜進士出身後為右正
言著亮直之名於當日肅字志宏南劍人有
文集號耕欄遺文三十卷詩附集中云云即
其人也今本僅詩一卷詞一卷文十四卷與三
十卷之數不符殆散佚不完又經金人重編
歟當張邦昌之僭立也肅間行奔赴南京其
擢右正言即在是時大節與杜甫畧相似其
靖康迎駕行後迎駕行等篇亦頗近甫奉先

諸作南北宋間可謂篤勵名節之士又唐宋
以來學者皆尊揚雄熙寧中遂至配享而肅
書揚雄事獨指為叛臣無可容於天地之間
與沈與求疏論王安石過尊揚雄未知孰為
先後然均在朱子綱目書葬大夫之前考陸
深溪山餘話載肅與朱子父松相善有醉留
冠帶以質紙筆之戲肅有寄朱韋齋詩即道
其事然則綱目之斥揚雄得無傳肅之說乎

其識如是宜其立身有本末矣乾隆四十四年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集部四

拼欄集目錄

別集類三
宋

卷一

詩一

卷二

詩二

卷三

詩三

卷四

詩四

卷五

詩五

卷六

詩六

卷七

詩七

卷八

詩八

卷九

詩九

卷十

詩十

卷十一

樂府

卷十二

奏劄

卷十三

文

卷十四

書

卷十五

序

卷十六

記一

卷十七

記二

卷十八

記三

卷十九

題跋上

卷二十

題跋下

卷二十一

啟

簡

卷二十二

祭文

卷二十三

疏語

卷二十四

誌銘

卷二十五

評論

欽定四庫全書

目錄

欽定四庫全書

栟櫚集卷一

宋 鄧肅 撰

絕句

進花石詩狀

太學生臣鄧肅右臣竊見東南所進花木怪石無甚異者又不能無費臣今有策欲取天下奇絕之觀畢置皇帝陛下園中比之今日所貢者固萬萬勝之較之今日之費則無萬分之一臣已撰成文

字一軸伏望宣索

花石詩十一章

并序

臣聞功足以利一國者當享一國之樂德足以備四海者當受四海之奉恭惟皇帝陛下至仁之所勘神道之所化畢乎無外不可量數如一元默運萬物自春豈特宜民宜人使由其道雖鳥獸魚鱉莫不咸若是其所享宜何如哉雖移嵩嶽以為山決江海以為沼竭東風之所披拂者以為臺榭之觀且不足以奉

聖德之萬一區區官吏輒以根莖之細塊石之微挽舟而來動數千里竊竊然自謂其神剋鬼劃冠絕古今若真足以報國者以此觀之是特以一方之物奉天子曾不以天下之物奉天子也臣今有策欲取率土之濱山石之秀者花木之奇者不問大小尤可以駭心動目畢置陛下園中若天造地設曾不煩唾手之勞蓋其策為甚易而天下初勿知也臣獨知之喜而不寐謹吟成古詩十有一章章四句以叙其所欲

言者雖越祝代庖固不勝誅然春風鼓舞之下則
候蟲時鳥亦不約而自鳴耳惟陛下留神幸甚幸甚
蔽江載石巧玲瓏雨過嶙峋萬玉峰艫尾相銜貢天子
坐移蓬島到深宮

右一

浮花浪蕊自朱白月窟鬼方更奇絕繽紛萬里來如雲
上林玉砌酣春色

右二

守令講求爭効忠誓將花石埽地空那知臣子力可盡
報上之德要難窮

右三

天為黎民生父母勝景端須盡寰宇豈同臣庶作園池
但隔牆籬分爾汝

右四

皇帝之圓浩無涯日月所照同一家北連幽薊南交趾
東極蟠木西流沙

右五

是中嵩嶽磨星斗下視羣山真培塿千年老木矯龍蛇
天風夜作雷霆吼

右六

三月和風塞太空天涯海角競青紅不知花卉何遠近
六合內外俱春容

右七

聖主襟胸包率土天錫園池乃如許坐觀塊石與根莖

無乃卑凡不足數

右八

飽食官吏不深思務求新巧日孳孳不知均是圃中物
遷遠而近蓋其私

右九

恭惟聖德高舜禹一圃豈嘗分彼此世人用管妄窺天
水陸驅馳煩赤子

右十

安得守令體宸衷不復區區踵前蹤但為君王安百姓
圃中無日不春風

右十一

巖桂

雨過西風作晚涼連雲老翠出新黃清芬一日來天闕
世上龍涎不敢香

梅

不顧冬殘自在妍笑將疎影弄嬋娟小軒不用垂簾幙

我醉花香自得仙

泛江

風迴浪急月初圓
携得魚竿下釣船
自是高歌星斗上
不須騎氣夜行天

姜池源廟二首

樽酒源頭一拜神
麝羊甕爾便青春
當年早魃殄餘虐
禱去陽侯失舊津

其二

博帶峨冠新廟像長衫紫領樂耕民雨暘從此如常德
願作常山薦號人

靈應寺

松篁擁翠入雲間雅稱高人卷道閑自是紅塵飛不到
一溪流水遶青山

又

老木森森小徑斜淡烟橫鎖兩三家晚來欲寫瀟疎景
舉目遙岑更望賒

偶題

一葉漁舠破曉煙
山環碧玉水連天
滿傾竹葉倚紅玉
天遣行雲慰謫仙

靖節先生祠下

五柳歸來昔陶公
七閩召還今鄧子
不將出處作殊觀
便了陶鄧無生死

鄆州道上早行

疎簾不下縱荷香
夢破紗厨月滿廊
笑盡一杯鞭馬去

恍疑山色是家鄉

寄張應和運副

當年曾忝從官班再拜天顏咫尺間
今歷千山嫌未穩
芒鞋明日又登山

又

土屋茅茨山萬重陰雲不解雨濛濛
桃源目斷知何處
身在杜陵詩句中

詠史

雨過東山春意濃
但携桃李步春風
眼高四海無勍敵
百萬貔貅一體空

又

五湖范蠡携西子
三國周郎嫁小喬
蓋世功名聊唾手
何妨樽酒醉妖嬈

戲題

我欲開樽百物無
鄰家酒熟各觴吾
扶杖出門又應供
三生恐是賓頭盧

訪故人

天寒歲暮兩無聊
訪戴那辭千里遙
直上洞天三十六
馬蹄迤邐醉瓊瑶

題枕碧閣

清流繩斷炎洲境
松響挾將寒意來
坐上逸情留不住
欲隨風月過蓬萊

次韵李狀元送酒

年年樽酒是生涯
赤脚曾無解語花
明日可來文字飲

新詩共吐半天霞

次韵順之奏雅

誰回厄會作民祿憑君上天厭人欲要將勲業稱貂裘
世間豈曰無衣六

右一

謫仙酒渴要吞江劉毅一呼從此欲當知明瓊亦有神
引上洞天三十六

右二

夢蝶莊周心槁木入柳穿花本無欲杯酒行春當此時
忽遇清風一百六

右三

神仙醉歌天上曲暖春肯念人間欲謾將郊島繼韓豪
五出那配天葩六

右四

鳳池小飲

北山知有出郊心為霽春寒十日陰水石本為遷客共

一枝瑞玉寄深林

落梅

一夕狂風雨萬英醉扶筇竹踏疎星歸來衫袖天香冷
一洗人間龍麝腥

右一

飄零不用嘆春工風味端期鼎鼎中欲攬陽和歸宇宙
何妨飛舞作先鋒

右二

和鄧成材五絕

扶筇欲過北山來
政賴詩囊一笑開
故走溪山尋勝景
為君携向筆端來

右一

僕在衫口未謁
成材先遊靈岩

酒兵招我破愁城
頓覺春風拂面生
却道豺狼飛小艇
當知揜手又翻羹

右二

成材詩中相招而某又
避地西去不能往赴

朱紫紛趨舊日班
羨君不動屹如山
卷將禹稷平生志

掉首歸為陋巷顏

右三

建昌已拜番檄
成材棄官歸里

句法徒能泣鬼神
文窮欲餓嘆無因
臨存多謝知音鮑
為洗胸中萬斛塵

右四

嘗辱成材過
避地之所

卧龍何日起南陽
萬騎追風競挽強
射落長庚作頑石
坐令四海復農桑

右五

南歸醉題家圃

六言

填海我如精衛當車人笑螳螂六合羣黎有補一身萬
段何妨

又

近輔暴追狼虎聖君德大乾坤萬里去黃金闕一杯得
杏花村

栢欄集卷一

欽定四庫全書

柟櫨集卷二

宋 鄧肅 撰

律詩

凝翠閣陪李梁谿次韵

欄前碧玉四圍寬，滿座清風文字歡。
霜氣襲人秋更爽，硯光映月夜生寒。
登臨顧我那能賦，姓字從公遂不漫。
此景此時難再得，相思但把錦囊看。

謝見招者

近體詩兼用
鄰韵出入

機鋒不契更何圖便合浮杯出上都此去定須安短褐
平生那肯曳長裾迴天儻是奇男子綰印原非大丈夫
揮手出門殊不惡一帆秋水及鱸魚

謝朱喬年

喬年觴客以冠帶寓之醉起曰留以
質紙筆明日如約朱授筆還冠而以

紙為太鮮也却之曰儻無千幅
紙竟不往矣鄧子以詩謝之

歸帽納毫真得策要賤留帶計何疎公如買菜苦求益
我已忘要何用渠開戶羽衣聊自適堆窓柿葉對人書
帝都聲價君知否寄付新傳折檻朱

哭陳興宗先生

森森松竹瑣春風半掩柴門一徑通
獨步水雲情似鶴對人談論氣如虹
詩書當日三冬富光燄他時萬丈雄
忽馭冷風徑歸去長庚依舊耿秋空

右一

蘿鹽昔者謾儒宮韋白茅黃處處同
十載從公煩點鐵寸毫今我稍披聾
一泓漸笑牛蹄水萬里初觀羊角風
欲反三隅嗟已矣兩行哀淚付春風

右二

滿目悲辛誰與言叩門不應更依然一斑昔我常窺豹
五色還公自補天新墮只今堪挂劍枯桐從此不調弦
典刑今有阿戎在定與相從對白蓮

右三

無題

風行水上偶成文暖入園林自在春換骨雖工非我有
嘔心得句為誰珍三生戒老詩堪畫千古長庚筆有神

不用臨風嘆奔逸
簞瓢一笑舜何人

西庵餞春

傍水禪房半掩門
乍晴簾幕捲黃昏
風驅紅雨春何在
酒入香肌玉自溫
勿笑飢腸充笋蕨
須將醉眼蓋乾坤
杖頭更有百錢在
明日還尋未到村

喜雨

萬里炎州政鬱蒸
阿香槌鼓忽砰轟
雲驅鐵騎千山合
雨挽銀河一夜傾
龜坼有田皆濯濯
蠋毛無稻不生生

高樓破曉朱簾捲六合無塵萬象清

其二

陽蟲赫赫欲流金夾岸垂楊失翠陰已恐人間被湯旱
誰從天上作商霖崇墉定有千箱積果腹同傾四海心
我亦不須憂脫粟聊賡既醉入瑤琴

再和宰公

誰向人間脫甑蒸煩公大計激雷轟高才自是百夫特
出語當令四座傾霖雨雖從天上降煙雲要自筆端生

吹噓六合無凡骨例欲乘風欸太清

右一

斗樞不見走蛇金萬里晴空無寸陰
郝扇雖交更揮汗
嵩車才出輒成霖
詩如翻水驚黃絹
力可回天在赤心
百里敢煩天下手
豐年無事但鳴琴

右二

次韵龍學丈

水色山光入畫屏
浩然相對自由身
芳菲莫恨無情去

天地常藏不盡春，倘得江湖化酒醴，何須瓦礫點金銀。
是日諸公各論燒丹。花開花謝兩休問，且向樽前一笑頻。

和姜季資

入手新詩奪化機，一天星斗夜無輝。想君佳思真泉湧，
索我強辭似箭飛。半昔端為覆轡用，臨時那得錦囊歸。
不如且遣長鬚去，兀坐冥搜更下帷。

雪際嶺

狂直初無涉世才，雷公斥下九天來。面衝風雪吹三月，

鳥避干戈易四迴帶雪燒柴平體栗漚槽沽酒慰飢雷
如聞明日登閩嶺茅舍春風夜滿懷

和邵宣教

未須絕跡便食霞且飲當朝諫議茶法水有緣隨遠浪
污泥無計染蓮花千篇信筆花無語萬里浮螺觸處家
已悟色空元不兩夔蛇何用更憐蛇

仲子叔明二邦君兼濟子安德和文明四使者
同過逐客於文殊偶食無肉客既滿意而主

人畧無愧色作詩一首

謫宦亡聊又出奔敢欺冠蓋也臨存豪華自厭蒸人乳
冷落能來叩席門莫嘆愁腸充苜蓿從來醉眼蓋乾坤
相知政在世情外賜達回窮不足論

送丹霞

白蓮結社記前緣偶到人間共一年對坐三生形已改
相逢一笑性猶全法緣振地公今佛逸思磨天我亦仙
明日清風飛短棹羨師先去得林泉

遣妓

吾徒得酒便超然何用紅妝惱醉眠
密約自憐非宋玉官差聊復浼梅仙
樽前起舞無鸚鵡坐上求歸似杜鵑
去去眼中無俗物却將詩律絆春妍

遊山

花柳年來不忍春出郊聊復寫憂熏
天因御史欲飛雨山為文公却霽雲
寸舌不須論理亂一犁安得遂耕耘
憑君且盡杯中物酒惡花香自在聞

謝呂友善見和

扶筇西去謾尋春，獨學無人沐且熏。
便欲問津從桀溺，當時折檻愧朱雲。
陰霾滿目憑誰掃，芳草連空未易耘。
家學定須興尚父，威聲一振九州聞。

謝吳少緄和

茅齋對語夜生春，簾幙低圍沉水熏。
冷坐顧余心似鐵，題詩羨子氣如雲。
山巔有蕨應同采，郭外無田可獨耘。
市酒盈樽且狂飲，兒曹昵昵不須聞。

次韵茂實之才

謫官誰道不知春，出郭猶能一醉熏。
銀筆爭題追鮑謝，席門琢句擬機雲。
東垣敢念百朋錫，南畝當從千耦耘。
剩乞新詩殊不惡，恐因叩角徹天聞。

秋日白蓮

竹外玻璃十頃寬，水芝高下刻琅玕。
冷香剪剪秋風動，孤艷泠泠曉月寒。
康樂氣豪猶出社，易之韵俗更誰看。
笑談今日親姑射，太華高吟不數韓。

訪故人

扁舟載月隨夜風曉到溪源訪老農
水骨借風鳴活活澗毛被雨綠茸茸
竹萌已削瓊瑤白村酒仍沽琥珀濃
醉倒田間無一事九衢車馬自衝衝

瑞鷓鴣

北書一紙慘天容花柳春風不敢穠
未學宣尼歌鳳德姑從阮籍哭途窮
此身已落千山外舊事迴思一夢中
何日中興煩吉甫洗開陰翳放晴空

羅知縣挽詩

閉門經史自優游，氣宇凌凌上斗牛。
從政逝將除鳥鼠，傳家那肯墜箕裘。
人間端欲揮銀筆，天上俄聞記玉樓。
山北山南何處問，翩翩丹旆舞殘秋。

次宋左司韵

往事無如今日新，鑾輿一再慟蒙塵。
陽微陰極故多雨，柳怨花愁不忍春。
已遣侈心傾虎帳，行收淚眼拜楓宸。
眼前惡景君休問，勝負相資臂屈伸。

戲彥成端友

一天梅雨亂繽紛二陸超然樂事并
師命炙牛携越妾
相如滌器對文君
閉門嗟我如孫敬
載酒誰人過子雲
窺竇有心公肯否
要將文字雜紅裙

寄張子猷

九州征馬暗塵埃
政恐狂瀾不可迴
敢念陶潛舊彭澤
當尋阮肇過天台
三朝我乏回天力
一壑君還釣月來
便好相從長夜飲
簞瓢新有晡青苔

自嘲

蹤跡平生半九區
醉倒時得蛾眉扶
連年兵火四方沸
一飽雞豚半月無
往是今非孔北海
分司自到賓頭盧
卷簾月色招人醉
三百青銅徑自沽

偶成

蒼苔白石兩清幽
縹緲紅橋跨碧流
日過窻間騰野馬
雨餘牆角篆蝸牛
飢寒不作妻孥念
笑語那知天地秋
一注水沉叅鼻觀
掃空六鑿自天游

又

夢破南窓裊水沉卧看素壁挂瑤琴
絲絲細雨晚煙合閣閣鳴蛙蔓草深
但得窺邊眠吏部不妨跨下辱淮陰
何時樓上登晴景一醉聊舒萬里心

又

萬里歸來卧白雲虬蟬撼樹政紛紛
大兒文舉知何在巨擘於陵亦漫云
空洞能容數百輩蒙朧如見月三分
小槽誰有真珠滴徑覓吾徒作半醺

次韵王信州

逐客難叅國士憂扶筇萬里過閩甌
藜羹充腹初無憾
枯矢凌江生計愁長夜漫漫不肯旦
梅霖濯濯未應休
醉中我欲呼風伯一掃陰霾霽九州

右一

風波未暇怨浮萍多謝朋來慰此情
君似張憑真理窟
我慙侯喜得詩聲酒盃莫向吾徒淺
句法當令叔世驚
又恐諸生連茹去堂堂王室要扶傾

右二

平生恥為一身謀
枿斲方圓兩不投
蟣虱但知貪肉食
醯雞何足語天遊
雪餘自閉袁安戶
月皎時登王粲樓
更得吾人詩句好
當知此樂與天侔

右三

枿櫚集卷二

欽定四庫全書

柟櫨集卷三

宋 鄧肅 撰

律詩

和李梁溪春雪韻

白白朱朱春已深
那知雪意更陰陰
落花幾陣遮山密
穿褐餘寒賴酒禁
騎馬不前真有恨
留衣過臘豈無心
等為遷客俱逢雪
誰侶梁溪獨醉吟

又

玄冥忽欲作春容不許東君利自封已使素英施暖絮
更摧妖艷別寒松那知往事思飛燕預慶豐年免象龍
向有謫仙詩句好何妨閉戶醉金鍾

送春

宿雨初開萬翠屏相携雲水自由身寸心未逐鶯花老
一笑能留天地春倘得新詩同刻燭不妨濁酒共傾銀
往來一氣何須問蝙蝠飛時日正辰

分歲

餘臘羈人少共歡
那堪瑞雪降雲端
四時欲盡三更鼓
六出翻成兩歲寒
欺壓嶺梅殘艷白
密敲亭竹碎聲乾
公卿休埽黌堂下
留與來朝賀客看

鄰家翁挽辭

凜然風韵老尤癯
方寸經營包九區
害栗巧為任氏策
縛舩冷笑退之迂
深藏未肯驕僮僕
儉德端能率里閭
故使考終踰七十
不因財害似齊奴

其二

高堂晏坐亦何忙
金水聊觀毀與穰
遠配刀間籠桀黠
未饒倚頓埒侯王
桑麻有畝今千計
牛馬難言用谷量
可惜一朝螺變黍
千金無藥治膏盲

從昭祖乞糖霜

甜滿中邊一夜冰
璀璨璀璨自天成
冷香入骨追瓊液
秀色當筵瑩水晶
絳闕不須餐沆瀣
玉池何事養胎津
從公乞取洗蒸鬱
一馭寒風上太清

避地過雷霹灘

門前又見馬如流，兵革繽紛幾日休。
嶺似車盤方稅駕，灘如雷霹更行舟。
鯨鯢敢侮乾坤大，江海徒深蟻虱憂。
安得將臺登李郭，挽回羲御照神州。

偶題

才薄難趨供奉班，歸來作意水雲閑。
謫官謾說九年計，客枕曾無一夕安。
渭水不應藏釣艇，淮陰便合起登壇。
喚回勝境憑夫子，使我甘歸苜蓿盤。

次韵謝明遠和

乞身大小為溪山征鼓不容簑笠閑酷暑扁舟同海角
暖風盃酒念長安高情我自歸蓮社妙譽君應冠杏壇
更約三山少從欵赭虬吐卯槃金盤

題步瀛閣

玲瓏畫閣入鴻冥隱約鴻冥入太清紫氣氤氲隨去步
青霞杳靄入行旌桃花浪透三山近龜角屏高七朶橫
解逐梅仙在塵世誰知塵世有蓬瀛

子安提舉

南奔千里已途窮更向長江避敵鋒十口未容謀去住
片帆那暇擇西東乞殘不忍從司業食粥新來侶魯公
賴有詩情推不老時將新句吐長虹

某初欲過興化今乃止耳故詩中具

之以為他
日志也

又

征鼓驅人夜發船別來無處寫憂煎高吟自答咄嚶嘯
旅食時開鬱屈筵君去青天纔尺五我今白髮已三千
何當却飲南湖月顛倒衣裳舞謫仙

山中岑寂時有嘯
於梁者日中所享

不過以鰻魚
為絕品耳

次韵

玉殿曾叨侍冕旒才疎意廣誤旁求
彙征那敢私連茹
勇退何妨在急流蓬華已無原憲室
江山且飽子長遊
西庵軒檻多風月幸子來時共茗甌

又

怪底祥光夜滿門朝來入社得詩人
空疎嗟我句無眼
俊逸知君筆有神共隱兵戈不到處
相携雲水自由身

便當痛飲追河朔紅雪繽紛膾錦鱗

次韵郭宰無簡丞尉

獨領詩壇卧北窗故應落筆士夫降
笑談自埽剡藤萬聲價曾高魏闕雙
六合便當歸化筆一同聊復賞澄江
初無官繁煩游刃夜飲何妨取萬缸

右一

只將詩律對晴窗我本無為人自降
曹子棒頭施五色崔侯廳下植松雙
千篇堪友騎鯨李八詠當奴夢筆江

文字興餘行樂耳肯容碧玉自盈缸

右二

一點螢燈續曉窗已千人十未甘降見聞僅得豹斑一
勝負猶爭蝸角雙山聳劍鋒登九坂浪翻銀屋度三江
歸来自在春風裏時得萱堂獻酒缸

右三

洪丞和來再次韵

堂堂國士洪夫子刻燭從渠心自降妙手故應釣鰲六

得君那用射鳶雙
定隨國老興東海
官効騷人慟楚江
酒醴祇今須麴蘖
要令六合共盈缸

右一

世事無由到竹窗
只餘心賞獨難降
雨餘翡翠山連七
春漲玻璃磯自雙
萬壑不須看越嶠
千尋端可配吳江
搢衣便欲同清景
安得黃封列萬缸

右二

又述

萬里歸來一小窗利名心滅不須降雖無何子食錢萬
未到潘郎雪鬢雙樓上詩狂欲騎月晚來酒渴思吞江
從今痛飲須論日瑣瑣那能問幾缸

成彥玄奴琵琶

婷婷裊裊出紗窗坐使紅妝萬目降翠袖薄籠春笋十
玉釵初合綠雲雙四弦對客追三疊萬喚令人憶九江
曼倩酒狂本無量為渠潑灑倒銀缸

寄璨老西軒

水沉一炷裊晴窗默坐無心得降沍露菖蒲能寸寸
語晴新燕自雙雙祇今得免不鑽紙那用浮杯更渡江
前世遠公只師是好從元亮供千缸

林提學挽詞

文陣曾驚賢士闕青衿袖手仰登壇當年聲價輝寒谷
晚節清貧耐歲寒地下修文屈顏子人間談易笑丁寬
傳家賴有千人傑三接天衢不作難

提學嘗橫經上庠
朝鮮受其傳以歸

和陳少卿

懶從蒿目世間憂，緩步招提味九丘。
正論羨君無鄭衛，窮途慰我在商周。
飄然忽作遷喬興，卓爾難追跨海遊。
別去詞源應萬斛，幸分涓滴洗離愁。

謹次第三章

海角誰能寫客憂，童顏鶴髮顧崇丘。
風流君似東山謝，勲業余慚赤壁周。
落筆敢陪風雨疾，扶筇時共水雲遊。
明朝却羨先生去，萬頃煙波醉莫愁。

別陳少卿

平生杯酒百無憂四海風流陳太丘據景筆端凌鮑謝
當年門下得伊周那知避世欽欽迹也許從公汗漫遊
聞說片帆今又舉三山無處著人愁

偶成

我生詩酒弄林泉紫詔三呼出洞天高視塵寰但蚊睫
冷看時輩聳鸞肩山間已袖嬰鱗手物外今還釣月船
若使兒曹知此樂人人同得地行仙

其二

數椽茅屋傍山隈野草如雲徑不開小院縱橫行蟻陣
孤燈明滅縱蚊雷并包益見乾坤大掃滅何時風雪來
磊塊胸中何處洗酒行到手莫停杯

鳳池小飲

愁見孤城萬馬屯山行飄若出塵樊臨池想鳳心皆妄
據檻觀魚道更尊笑吸百川淋酒渴旁看三峽倒詞源
人生適意須觴詠世事升沉不足論

次韵鄧成彥

搶榆不羨貼天飛
冷落柴門半掩扉
花榭水軒催客老
飯羹酒甕與心違
風流沈約自應瘦
美好陳平今已非
誰似宗盟重山嶽
九環金帶稱腰圍

戲洪丞

萬里歸來雲水鄉
逢春得酒且彷徨
好賢誰似雙松吏
使我時終一石狂
忽與高堂來鼠目
却令朱戶鎖梅粧
先生取瑟吾知己
安得從今不舉觴

次韵凝翠閣看水

欄杆十二俯烟濤冒雨從君一醉陶頗覺寒窓侵島瘦
故將勝景助韓豪波聲裂岼漁歌遠水勢橫天釣艇高
前日主人今國老乘桴何處泛滔滔

再次前韵

蕭條門巷半萊蒿杯酒田間亦自陶採栗久要工部拙
騎鯨偶廁謫仙豪狂歌故作風雷噫逸興何妨日月高
勝景賴君佳句壑胸中江漢更滔滔

又

琢磨佳句敵離騷
賴得朋來漉酒陶
時遣紆餘資卓犖
更將華妙濟雄豪
閣臨巨浸南溟近
簾捲晴空北極高
更約高談句法外
可憐天下正滔滔

陳大夫華嚴閣

星郎德望欲摩天
坎止流行任自然
直道不回真鐵石
高懷未老已林泉
宗門夙了風幡動
傑閣聊修香火緣
顧我驅馳成底事
羨公真是地行仙

枌櫚集卷三

欽定四庫全書

枰櫚集卷四

宋 鄧肅 撰

古風

靖康迎駕行

健兒作意厭人肝
揮鞭直視無長安
南渡黃河如履地
東有太行不能山
帝城周遭八十里
二十萬兵氣裂眦
旌旗城上亂雲煙
腰間寶劍凝秋水
雪花一日故濛濛
皂幟登城吹黑風
我師舉頭不敢視
脫兔放豚一掃空

夜起火光迷鳳闕鉦鼓砰轟地欲裂斯民啓啓將焉之
相顧無言惟泣血僕射何公叩龍墀圍閉相臣臣噬臍
竒兵化作乞和使誓捐一死生羣黎遊談似霽大帥怒
九鼎如山疑復顧郊南期稅上皇輿截破黃流徑歸去
陛下仁孝有虞均忍令征騎聳吾親不龜太史自鞭馬
一出喚回社稷春敵人慕得猶貪利千乘載金未滿意
釵鈿那為六宮留大索民居幾卷地六龍再為蒼生出
身磨虎牙恬不恤重城突兀萬騎屯杳隔鑾輿今十日

南門赤子日駢闐爭掬香膏自頂然忿氣為雲淚為雨
漫漫白晝無青天太王事狄空金帛坐使卜年踰八百
天聽端在民心耳蒼蒼誰云九萬隔會看春風擁赭黃
萬民歌呼喜欲狂天雨無塵瞻北極旄頭落地化頑石

寄司錄朝奉無簡伯壽

老松古栢爭清勁社稷元勲李文正風流千古照人寒
家有白眉聲益振十年遊宦落窮山妾無衣帛日號寒
只餘淨業磨不去駸駸筆勢江湖寬阿戎作詩更難偶

銀鈎仍復規顏柳蒼藤千尺練敲冰萬軸晶瑩照窓牖
明月夜光兩相酌束筭堆床曾不休公家自有嘔心戒
豈容雕琢損天遊嗟我無文出月脇惟有蓬窗堆柿葉
如何分我三百萬試掃危言助調變

道原惠茗以長句報謝

太丘官清百物無青衫半作蕉葉枯尚念故人家四壁
郝原春雪隨雙魚榴火雨餘烘滿院宿酒攻人劇刀箭
李白起觀仙人掌盧仝欣覩諫議面瓶笙已作魚眼從

楊花傍念輕隨風擊拂共看三昧手白雲洞中騰玉龍
堆胸磊塊一澆散乘風便欲歛天漢却憐世士不偕來
為借千將誅趙贊

大雨

夜夜陰雲如潑墨雨勢欲挽銀河竭春工十八落泥塗
驟雨誰云不終日魏紫姚黃業已空嬉遊何足介心胸
只恐年年禾黍地浸淫盡入陽侯宮憑誰為我呼少女
掃空陰翳開天宇光風霽日暖層霄坐令六合同歌舞

芙蓉軒

我開幽軒榜芙蓉琉璃十頃浸新紅此來踏雪空無有
黃蘆敗葦爭號風却坐明窓弄書史新詞仍試佳毫楮
香風忽到簾幙開一朵芙蓉却能語我生眼中萬妖嬈
為渠還作夢渠勞炙牛未數劉師命驂鸞便學王子喬

賀朱喬年生日

三春一半入羣芳朱朱白白競天香人間無處著此景
付與長庚作肺腸長庚乘風下天宇明窓萬卷飽今古

筆端著處皆春容
文墨林中三角虎
祇今聲價高雲煙
要轍故應歲九遷
便當折檻追家世
與國同休億萬年

謝虞守送酒

瑟瑟嚴風鼓蓬戶
對話春園兩亡趣
使君送酒喚春來
坐使漫空翻柳絮
雪榭懸知雪未消
一日千里皆瓊瑤
詩仙冷坐清入骨
便合九萬搏扶搖
回首故園歸未得
天意留人亦奇絕
我今幸得賢主人
公亦未易有此客

別虞守

閩山去天惟尺五，傍立怪石如蹲虎。
點額龍墀萬里歸，未能赤脚走風雨。
慙愧使君肯相延，十日傾酒如流泉。
文字興餘亦不惡，紅粧執約艷神仙。
明日馮驩出有車，遠借仁風歸故廬。
不用回頭重引領，行矣商霖到海隅。

昭祖送韓文

兩鳥相酬不肯休，欲令日月無旋軸。
斯文未喪得韓子，掃滅陰霾霽九州。
古來散文與詩律，二手方圓不兼筆。
獨渠星斗列心胸，散落毫端俱第一。
陋巷嗟余四壁空。

惡本雕殘付蠹蟲雖得一斑時可意魚魯紛紛意莫窮
好古誰似城南杜平生不矜潤屋富力刊善本妙毫釐
日費千金曾不顧老藤截玉奴側理千古松煤騰碧烟
入手五行俱可下兀兀短檠忘夜眠我生嗜好隨時改
獨有此書心不解欲貯厚意誰也無更為先生作阿買

偶成

乘風上天歎天語天公不怒雷公怒烟霄一斥下人間
敵兵旁午歸無路欲度三吳血盈川欲泛九江兵闔天

扶筇却出徽城去去天一握五危巔水陸辛勤已足矣
雪花更開九萬里英雄困餓古猶今莫學兒曹生愠喜
題顯親庵謹次嚴韵

寒蘆敗葦秋風嚴魏紫姚黃春色妍誰能不隨天地轉
開闔自我古無前秋花忽從三月盛引得好詩來相慶
為見漫空兒女姿義氣稍回君子正我頃失魚緣釣直
抱璞未酌不須泣天生我輩豈偶然但驅百怪歸篇什
慙愧梅仙情最親期我看花三省身已越春風聊一笑

更做秋霜不改春

送思道福唐

狂風一過天如洗
四卷陰雲空萬里
高樓月色三更寒
漁歌相應起寒葦
一樽初對謫仙人
只用瀾翻細論文
半夜拂衣翩欲往
飄飄逸興凌秋雲
破浪扁舟一葉細
問君去去端君意
笑言演峽隘心胸
要觀閩海浩無際
顧我虀鹽尚泮宮
安得化雲便從龍
好景欲觀今未遂
憑君驅入錦囊中

與郭舜欽朝請

成均冷坐窮吞紙額叩龍墀濱九死背負琴書偶生還
賴有春風滿故里故里渺居天一隅因仍蔓草不堪除
多謝先生肯遊刃號令雷霆一掃驅舊弊忽消新慶長
老稚相携紛闕坐使牛蹄一畝中九萬共搏羊角上
只恐朝廷急英雄割雞不用煩屠龍政須太山來壑卵
金闕喚回小令公陋巷嗟余空四壁餓死平生無枉尺
知音今有昌黎公王川得卧三竿日

遣興

醉中飛夢到神清
夜半高樓借水明
下瞰寒溪凝水晶
孺子相呼同濯纓
樓上天人百寶瓔
瑞色天香充棟楹
步雲一曲語春鶯
千山洗空烟霧橫
酒醒簾外竹陰行
夜風更爲芭蕉生
愁腸起向謫仙呈
夢境憑君指顧成
一開後堂花柳盈
香肌可邁六出霙
珮玉步蓮不自輕
寒眼那能更指令
春葱斜捧玉壺傾
真珠紅滴濃無聲
一醉花間豈易營
歸來十日寸心縈
蘭亭家風類帝京

為余亦復出花城柳腰隨風萬里征鞍馬不復數歸程
坐令鐵心宋廣平夜揩醉眼賞梅英歌燕舞趙藝更精
過雲迴雪未可評人間不復數娥嬋神仙遊戲肉眼驚
我生不顧萬鍾榮對花有酒即蓬瀛高會何須四者并
赤脚亦能寫高情最恨蘇公世公卿家聲往往九州傾
風流陣中却寢兵酒甌但借鄰姬擎何日高樓鐘鼓鳴
如我心醉如春醒

題天慶觀

真人躡身凌紫霞下憫濁世長咨嗟崇樓傑閣耀金碧
開闡至道非雄夸仙茅連山可度世守此規規如井蛙
靈雲一笑萬事畢到今福地空桃花

寒梅上李舍人

窮山觸目紛茅葦此意昏昏誰可洗竹間忽破一枝梅
對月嫣然耿寒水吟詩索酒滿高堂穿簾的皪射晶光
世上羶葷來不到翦翦天風吹冷香人言百花睡未起
獨冠羣花差可喜那知和羹自有期未用爭雄壓桃李

但憐雨雪正濛濛
寒意未舒萬象窮
故作選鋒驅殘臘
挽回天地變春風

送李狀元還朝

元戎簾幙海濱開
謫仙騎鯨天上來
尊前談笑贊籌畫
一洗八郡無氛埃
功成揮鞭朝玉闕
九重閭闔開春色
要傳天意下人間
翰苑政須萬人傑
我今去國已五年
天子令伴黃冠仙
邂逅相逢君復去
林泉還我擅雲煙
君去上天歟天語
莫畏雷霆作強禦
人間疾苦欲叩天

天門嵯峨隔雲雨紅巾十萬今已無致此紅巾本何如
撥亂倘知原始末制挺自可鞭羣狙

霹靂松

老榦千年如削鐵螯龍釀春未肯泄阿香推車動地來
振起虬髯上天闕砰轟一聲驚倒人雨勢更挽銀河月
溟洲六月海生塵一朝化作無邊春

題梅齋

江邊蘆葦風颼颼東君一點破寒愁窗間疎影橫春瘦

枕上冷香尋夢幽夜半竹折驚殘雪醉起捲簾千山月
肺腑洗空龍麝腥落筆天香鬪清絕

耕欄集卷四

欽定四庫全書

柝欄集卷五

宋 鄧肅 撰

古風

賀梁溪李先生除右府

伏承大觀文丞相先生親承聖恩擢置右府縉紳
交慶正豪傑林立謀猷川行之時也肅不敢効世
俗諂語致賀直述京城圍閉君父蒙塵之狀以見
不共戴天之仇在所必報也伏乞鈞慈特賜采攬

門人左正言鄧肅謹百拜上

北兵振地喧輦鼓黑幟揷城遍樓櫓蔽空戈甲來如雲
羣盜相隨劇豺虎征塵漠漠四壁昏諸將變名竄軍伍
十萬兵噪龍德宮上皇避難幾無所嗣君匹馬詣行營
朕躬有罪非君父奸臣草表遽書降身率百官先拜舞
那知馮道冷笑渠立晉猶存中國主翠華竟作沙漠行
望雲頓有關河阻九天空殿鬱岌崑目斷離離變禾黍
生靈日夕望中興猶幸君王自神武相公特起為蒼生

下視蕭曹無足數詞議雲湧紛盈廷羣策但以二三取
老謀大節數子并行見翠華歸九五立馬常依仗下鳴
日詠杜鵑懷杜甫飛鳥猶尊古帝魂激烈浩歌來義旅
規模共佐李西平廟貌不移舊鐘簴

上先生

疲馬踏殘月荷策來泮宮入門見先生先生何雍容循
循言語能下誘青蒿因得附長松短檠挑燈一千二百
夜高談雄辯磊落沃胸中吾皇求士苦忽忽不許先生

久卧龍玉鞭斜指長安道祇緣此去何由從鳴啼吁小
軒從此冷如水蘼鹽朝暮欣欣爾空留絳帳照孤燈窓
外西風起寒葦

龍興避難

傍山怪石如蹲虎絕頂去天無尺五却披叢棘下山腰
丹碧照空飛棟宇道人養道厭塵勞避世只嫌山不高
那知行空老曼倩竊食不遺王母桃松檜參天門晝閉
碧玉擷蔬飯炊雪百年冷坐無車音一旦偕來真惡客

當知喧寂無殊觀出世何妨在世間能致吾人師作古
龍興今日始開山

和明遠喜雨作

絳狗鳴空朱虎攫神焦鬼爛不堪虐自嗟筆力無韓豪
不敢讒風干鼎鑊聞說祥符物外臣能將念力蘇罷民
挽出洞天肩未息飛雲驅雨已生春曹侯德我詩如洗
無乃采封遺下體當知此雨非人功政賴曹溪浩無底
君看連天六日陰簷聲夜和蓬窓吟羲和知師今日去

自行天上約秋霖

寄亨甫

晴空當畫樓
暘蟲目林欲焚
深甑中多謝
吾君肯相訪
袖中詩句來
清風愛主我
堪大馬比采
薇山巔行饑死
豈能五絕比
天人疾讀君
詩汗如洗
君今師友人
中豪
琢磨事業
當日高若扣
天門自求試
速為奉天留
陸贄

東林一枝庵

世間傑棟俯飛翰
簾旌不動天風寒
但得一身自安逸

誰思寒士三萬間東林天下推第一淨几明窓萬禪客
主人幽棲僅一枝便覺寬容無迫窄一身六尺何足患
蠢動當知俱欲安誰識曹溪一滴許能令法雨遍塵寰

醉吟軒

淵明句法古無有頭上幅巾供漉酒李白豪篇驚倒人
舉目望天不計斗二子風流不可追公作幽軒為喚回
長鯨渴興沉江海錦囊妙句生風雷安得一廛在公側
時時去作孔融客愁腸得酒生和風也向毫端寫春色

嘲蛇傷足

清官只得林泉幽也有曲脅潛相仇肆毒不知分彼此
後身那解癖春秋我嬰逆鱗龍不怒誰知蠢蠢敢當路
要我迷陽不作難祇恐壽光劾君去

送丹霞

山壓濃陰勢欲頽阿香推車振不開君來論詩風四起
挽出羲和照九垓別君八年驚電掃霜髭已失童顏好
逝者姑從造物流吾人一笑初不老明朝飛錫過平津

浩歌歸耕隴上雲石竇不應藏一滴要須化作無邊春
玩芳亭

蔓草芊芊迷舊圃日號狐狸走鼯鼠世欲去之嗟未能
竭力米鹽汗如雨先生人間第一流目中萬事無全牛
割雞已覺無多子斬新亭柳作清遊紛紛姚魏爭黃紫
醉眼雖觀心似水但搜佳景付吟覓吐作新詩爛盈紙
慙愧知音太史公為榜佳名字畫雄二公連茹歸霄漢
此亭萬古揚清風

小飲

斷臂一朝續狼肉裕矢漫空夜相逐海鳧亂飛三丈毛
藍田不行四寸玉何如南嶽追祖風雲間生致桃李穠
笑盡酒船三百斛醉吹簫管上晴空

質夫和來

我生不顧四壁空千金買笑醉春風半夜酒紅朝玉頰
亭亭秋水影芙蓉作文忽慕元和格遂入賢關親眉白
遽聞皇甫語穿天淵源蓋是退之客琢句出人數等高

要令天下無英豪擊節一觀百憂失不覺此身猶布袍
平生自足牛蹄水為公辟易數百里願得佳句時飛來
此間幸有子期耳雨意朝來猶許重安得相從恣嘲弄
蠶鹽充腹燈一螢兀坐亡聊真夢夢會鞭匹馬城東陬
對床臭味兩相投歸來筆下飽竒怪不須更事子長遊

紫芝和來

雨餘榴火欲燒空宮槐老翠閣薰風即今此景那可恃
忽觀玉露泣芙蓉請公文急出新格一變茅黃蕪韋白

坐令鼠輩掃地空母使再來相主客異日光芒李杜高
聲價豈但一時豪故應高視空四海紛紛過眼萬銀袍
我生作意遊弱水蓬萊杳隔三萬里何如平地揖詩仙
一洗從來鄭衛耳期公便作九鼎重雲水未容扁舟弄
漫天霖雨在胸襟半夜吹作高宗夢鬼方月窟雖殊陬
顏治之心輒相投澤民事業無多子要使人人鼓腹遊

邂逅宇文

閩山去天餘尺五漁浦撼舟驚九死臨水登山萬里來

却向春園飲墨水白雲目斷無飛翰夜將劍缺於誰彈
世人相馬例嫌瘦飢死首陽不作難側聞天下有人傑
洗出新詩耿冰雪年來亦復坐文窮空使品流居第一
摳衣浩歌起相從雨意却憂潑墨濃匆匆對語一笑粲
萬斛窮愁一洗空公今清譽高星斗我乃棲遲事奔走
收拾正賴退之豪瘦寒不復麾島郊

別施君叔异

泮水儒生急寸祿白袍千人如立鵠爭注蟲魚腹置錐

世外語言不到目我嫵人醉還啜醺常嗟心迹兩相離
邂逅得君能我意筆端聊復出新奇愛君未冠少年郎
語出輒驚鵷鷺行若不紛華替初志事業他日未易量
今披青衫走塵土滿面春風歸仕路拄笏政可望西山
莫見輜軒腰偃僂我今繫維猶未釋相思何處訪縱跡
為君時望斗牛間期君光芒高萬尺

雨花軒

君不見解空晏坐寂無侶寶花忽爾窺岩戶已將精進

聳人天是用色相旌其苦又不見毘耶居士坐高堂四
落天花趁揮塵若人猶有空可談真機何處遁天女豐
岩寂寂梵王家誰把幽岩名雨花我知此誠齊人耳但
識解空與毘耶誰知豐岩了無取口角瀾翻初不語吾
宗未出天莫窺豈復有花可為雨

訪丹霞

煙雲著天無寸空寒窓瑟瑟夜號風浩歌出門何所詣
故人飛錫梵王宮扣門兀坐寂無語衲破蒙頭面如土

逢場聊復觸機鋒，千偈瀾翻疾風雨。我生鼻孔自撩天，
笑將龍肉比談禪。針芥相投得吾子，帖肉汗衫今脫然。
但憐淨業猶詩酒，醉筆時作蛟龍走。儻惟語默兩無妨，
憑公刻燭聯千首。況是雪意政相留，慎勿匆匆撫刀頭。
明日談笑作春色，同在瓊瑤十二樓。

戲吳少緄

短檠對君同泮水，齏鹽不給窮吞紙。君今載紙連數艘，
貧富相懸九萬里。崇寧政事先方田，紛紛訟牒亂雲烟。

祇今列屋飽蟲蠹官折羊酒壽高年夫子談笑收餘慶
不復塵埃生金甌便當痛飲天津橋一網盡呼天下俊

寄興國福聖二老

我本窮山采薇蕨偶上用

闕

日月雲端不肯舞仙人

天公雖笑雷公斤

闕

細肋

磨成炊飯似搏沙牛革偏甘真嚼鐵慙愧忘形二禪客
倒屣相迎作禪悅竹萌淪水瑩瓊瑤土芝借糟凝琥珀
余不供僧僧供余是事顛倒古所無要知人我兩無有

此飽便當均太虛昨日龍興飛尺書俛我登山有藍輿
試問二師肯俱否一飽還君欲借渠

送游教授

世事齷齪飢寒語思怨嘈然相爾汝蠅營狗苟端可憐
不見秋風黃鵠舉君看三山夜降神鍾成人傑超不羣
堂堂勁氣薄霄漢藐視四海豈無人簞瓢陋巷誰知己
自足一樽釣秋水惟使文星射紫微天書遂勅川龍起
笑來南國開絳帳議論清明森萬象已令鑪錘無頑金

九萬却搏羊角上飄飄歸興凌秋空莫恨丁寬易已東
天生若人不私子當令四海遍春風

廬山

平生作意廬山遊往來却貪吳越舟陛下許臣鞭匹馬
芒鞋因得款清幽是時六月蒸炎暑六合黃塵空一雨
上方冷翠襲衣襟便覺笑談在天宇



枌欄集卷五

欽定四庫全書

集部

栢欄集卷六至十一

詳校官左中允_臣塘五珠

主事_臣呂雲棟覆勘

覆校官中書_臣汪師曾

校對官助教_臣胡予襄

謄錄舉人_臣吳之承

欽定四庫全書

枰欄集卷六

宋 鄧肅 撰

古風

和謝吏部鐵字韻

紀德

切切寒蟲常在耳
未識詞源萬斛水
忽開玉軸見奇文
光怪摩空亂眸子
太傅江左風流人
靈運在家元不嗔
家世千年今復振
落筆飄飄語更真
頓足忘言驚妙絕

欲續貂蟬恨才拙鉛刀那敢望神劍舒屈無妨豈常鐵

右一

窮居如將豆塞耳一泓自足牛蹄水那知臨境有人豪
笑觀造化但兒子筆端萬字驚倒人春色秋風隨喜嗔
一讀錦囊殆仙去欲借銀駟遂朝真更當負笈慰愁絕
憑公一掃平生拙門人益親自得回會觀踏破門限鐵

右二

世上區區蠅狗耳不復解纓濯清水只知貪雀不留珠

可憐認賊翻為子珍重謝公天下人冷居林泉曾不嗔
雲煙萬木觀不足

關

真高節凌雲亦奇絕

不綰六印未為拙

關

只有布衾冷似鐵

右三

仕途例皆諂笑耳隨盤方圓無定水前年天子思奇才
霜臺曾擢右君子泛觀中外倘非人髮上衝冠聊一嗔
那顧城狐并社鼠好惡無私喜怒真底事年來迹又絕
笑道林泉似藏拙憑誰去斬佞臣頭請公速鑄楚山鐵

右四

四海紛紛箏笛耳誰識子期志流水韵高調古自難酬
得意政須副墨子我公聲價第一人積新居上笑不嗔
但將佳句妙今古逝變雕蟲返太真孟軻嘗續吾道絕
功與神禹論工拙先生今復迴狂瀾豈減旌陽柱鑄鐵

右五

引領門牆數舍耳劍之水源自樵水

公邵武人也

裴糧問道

嗟未能參前倚衡見夫子自笑昔為塵土人春狂時逐

賣符嗔年采懶情百事廢洗空人偽惟葆真更餘淨業
磨未絕強繼彌明不知拙豈是螳螂敢當車驂獸從來
食銅鐵

右六

李白嘗言人有耳不當徑流如川水男兒出處自有時
何須銳意楚狂子公今無意世間人北山有靈定不嗔
天子政作唐虞計谷口那留鄭子真佇觀大手稱奇絕
致君却笑前賢拙坐使梯航到鬼方來尋九州貢璆鐵

右七

眼中儒生聊爾耳，僅免春闈飲墨水。
可憐四海萬青衿，却愧建安六七子。
誰似丘侯獨可人，日無千篇即怒嗔。
腐語陳言俱掃滅，竒文秀句出天真。
虎頭固已稱詩絕，更逢安石分工拙。
新詩為侯特發揮，照人之明鑑磨鐵。

右八

結交要在相知耳，趣向不殊水投水。
請看丘侯對謝公，箭鋒相契無多子。
丘侯平日論律人，詳及謝公喜與嗔。

一得新詩即傳借許久誇談今見真車馬爭看紛不絕
新詩那簡茅簷拙脫腕供人嗟未能安得畢昇二板鐵

右九

三吳惡少飛綠耳殺人如麻壅流水餘風往往到江閩
魚爛鳥驚父離子紛然回顧作流人我侯正色回一嗔
坐使倉黃萬老弱復歌太平養性真百弊紛紛俱杜絕
四境無虞安樸拙方信哲夫自成城不須十仞堅削鐵

右十

忘心政須麴蘖耳醉仙如吸百川水男兒不復問聖賢
杯酒力辭真豈子我侯度量慙千人不滿金鍾却怒嗔
酒酣那復迷朱碧苗莠猶分偽與真人言狂藥要須絕
恐潰肺腸語亦拙那知真氣不可侵烏府如今肝是鐵

右十一

邑官有和者亦以詩寄之其人自云禦方寇有

功

寂寞相如四壁耳陋巷蕭然窮飲水雖似退之厭權門

時作封人慕君子慙愧知音箇中人近前不學丞相嗔
掀髯抵掌論今古肺腑恢然笑語真頃余學問非三絕
操瑟千齊謀更拙棲遲何以酬已知吾道不移研鑄鐵

右十二

丘宰生日

律管才吹九寸耳帝遣玄冥下司水百度稍多百四十
愛日差長十君子已剝羣陰驅小人四海熙熙語復嗔
因闢金闕謫太白不許天庭久煉真太白塵緣固未絕

肯將天巧形世拙會施霖雨滿人間歸對千年忘恙鐵

右十三

陽復朋來七日耳黎明當動有泉水

冬至後十日泉水動此以宣和辛丑

歷推之耳

陰陰寒谷未生春天閔斯民如赤子遂因天下生

奇人裨歌襦袴無怨嗔竭來割雞多暇日逸韵飄飄騰
九真瓊室瑤池津不絕冷笑人間衛生拙三竊蟠桃顏
益童那復虬髯面如鐵

右十四

和謝吏部

昔年怨聲常滿耳紛紛女巫未沉水天教我侯慰遠人
坐令盜賊化君子期年仁政遍人人撫之如子不須嗔
吏民欲欺亦不忍出言洞見胸中真要圖書問久已絕
人皆巧中渠寧拙優游黃卷有餘歡此志不回端截鐵

右十五

自叙

瑟瑟霜風欲聒耳小院枕衾如潑水夜清火冷不成眠

起就短檠閱諸子掩卷嗟嗟今古人

闕

可嗔

風日相憐紛無已一笑玄之妄亦真我今是非兩俱絕
百巧百中不如拙寂然無復一念邪那有黃冠下鞭鐵

右十六

惡聲不入伯夷耳嚴陵拂袖釣寒水古來豪傑例幽居
佩韞肯隨舟人子造化爐中忽為人笑笑隨緣又何嗔
細語麗言俱入妙醉中不必更陶真年來三復韋編絕
得趣無多一味拙物外翛然我已仙不愁石髓堅如鐵

右十七

萬物紛紛一馬耳百川不同均一水不將彼是作殊觀
坐使須彌納芥子李白高視空無人審言更作牙官嗔
可憐紙上較輕重畫餅象龍俱未真我師宣尼四病絕
抱甕寧作漢陰拙萬象紛紛不敢侵真室何須樞鍵鐵

右十八

遊山

高岩去天尺五耳下飛瀑布千尋水山間瘦竹映枯松

歲寒相對凜君子杖藜去去尋幽人剝啄扣門公勿嗔
凡骨臃脰尚不厭願供薪水看脩真高人隱几語言絕
大巧深闕

拙無乃誤遊天目山偶見唐公冠帶鐵

右十九

人生要在行樂耳四化相磨逝流水溪山佳處飽遨遊
莫為羶葷親俗子解龜誰顧謫仙人玉局題牆亦遭嗔
世人例作葉公解但喜畫龍誰識真何如便與塵寰絕
醉倒莫嫌茅店拙青驄門外繫垂楊旋乞青禾刈白鐵

右二十

門前如市不入耳忘言隱几心如水紛華時逐長安兒
清興何似毛錐子我雖事業未如人天公不等吾勿嗔
獨步高山尋兀室默坐燒香已悟真世事繽紛俱謝絕
叩角自歌愚且拙誰暇投書追賈誼更憂銅弊雜鉛鐵

右二十一

對酒

世上紛華蟻穴耳東流不作西歸水號寒那用學孟郊

捉月要須追李子一樽忽爾逢故人高談往事古人嗔
人間目下多忌諱

闕

醉鄉真但得如意酒不絕

四壁莫

闕

費數州鐵

右二十二

八斗一傾聊熟耳開匣時觀三尺水指天喝月使倒行
揚波直欲斬蛟子安得知音吾黨人相看青眼不余嗔
笑驅八蠻有奇策開懷聊與話誠真可憐吐哺風流絕
乞巧未遑姑守拙坐觀明月侵蝦蟇空使玉川懷寸鐵

右二十三

送成彥尉邵武

萬竅于喁風割耳梅影橫斜耿煙水殺雞為黍政追隨
七峰共作隱君子忽舉陽關餞行人去去莫愁官長嗔
但知所領馬曹似清談更覺子猷真谷風嘗譏朋友絕
子貢毋輕原憲拙期公鴻雁不空回開緘八行劃如鐵

右二十四

汗血神駒卓錫耳去侶蒼崖決積水據鞍年少笑西征

神仙中人梅氏子平生胸抱不由人點額再歸曾未頃
儀舌尚存斯足矣卞玉那愁無識真一官聊續箕裘絕
登山莫厭芒鞋拙會使狗偷掃地無不須蓬蒿揮鉅鐵

右二十五

山頭枯木半生耳山下琉璃剪碧水登山臨水兩超然
刻燭千篇對夫子我生也是不羈人白眼望天人共嗔
相逢賴有知音鮑揮塵不疑咳唾真子今更與竹林絕
我獨淒然守株拙望公聲譽騰九天不惟去作錚錚鐵

右二十六

別僧永肩

號寒啼飢自聒耳火中蓮花那著水超然不復顧塵寰
空色兩冥舍利子冠巾賈島齒平人當時僅免退之嗔
何如伯升雲水去萬劫不磨一點真公今更恐情難絕
泛作飛蓬謀未拙挽袖牽裳浩不迴當知若人是真鐵

右二十七

謝楊休

人生相值梗萍耳無酒投錢亦飲水況公家世足風流
封胡羯末又賢子匹馬來尋物外人坐上無氍寒不嗔
傾蓋相逢已如故洗空機械情更真公今在陳糧屢絕
惡圓喜方我九拙窮愁相守兩蕭然富驕何事如意鐵

右二十八

半夜絲簧紛養耳舞袖香風散沉水高堂嬉笑坐生春
不誦式微驚遊子孟公投轄雖知人故鄉千里兒曹嗔
毅然竟把刀頭舞百日夢歸今日真依前瘦馬登高絕

未應却笑此行拙
邑人脂膏子弗求
況是丘侯帽無鐵
右二十九

一歲無多數日耳
歸心應逐東流水
遙想解鞍在於門
滿室生春舞妻子
明朝去拜絳帷人
遲遲他邦莫勿嗔
願及散才求入社
寓詩千里寓尋真
醫門不與多病絕
無鹽自獻那羞拙
誰知此質非良全
政須乃翁為點鐵

右三十

呈幾叟儀曹

管中窺豹一斑耳敢對江海更言水賴公不作揚雄尾
舞雩曾許隨童子綈袍至今念故人世人欲殺渠不嗔
更將妙語為高價坐令玉表欲侔真期公終始不相絕
回愚參魯余亦拙異時報德但脩身那用張良袖中鐵

右三十一

世上乞憐

闕

汗流水轅車廁鼠端可憐

笑殺物外奇男子先生眼中無可人將軍汚足渠亦嗔
倘欲眠時遣客去兩忘物我淵明真世間勢位日懸絕

不能變渠平日拙政如強弓五十步無力可貫青唐鐵
右三十二

嶺雲去天一握耳取死一分天下水不解舟車千里來
賴有陳蕃知孺子當堂得酒觴故人醉倒花前夜不嗔
我來一見欣如故險語聊攄肺腑真安得眼邊萬事絕
與君千首較工拙樂死初無鍾自隨那學祠東墓費鐵
右三十三

忽忽百年石火耳偃鼠不踰一腹水胡椒百斛何為哉

簞瓢便可安顏子君看世間容悅人脅肩搖尾恐人嗔
所得僅能毛髮許抵掌無由一笑真期公便與此曹絕
折脚鐺中歸養拙富貴鼎來却應之鄂公未遇姑治鐵

右三十四

耕欄集卷六

欽定四庫全書

栢欄集卷七

宋 鄧肅 撰

古風

劉忠顯挽詞

靖康之變死其事者數人然皆人死之耳獨忠顯
劉公勲業聲譽著於兩河敵乞於朝蓋將用之公
獨不顧毅然自盡此所以卓然拔乎其萃為當今
第一人也某以布衣辱公父子兄弟待以國士頃

嘗論公之節如顏真卿杲卿等或者駭之曰公尚
亡恙子安得出此語乎忽忽十年而公竟以節聞
更出顏公之右識者然後知某前日之言自管見
盖非偶然耳公喪南歸義當匍匐一慟新阡之下
但方以罪逐不欲徹聲於賢公卿之門今仲固馳
書索詩以助挽人之唱某敢不勉然我公氣義欲
穿天心金人雖有萬衆不得以兵甲威之今欲寫
於毫楮間顧豈區區章句數字得以縛之乎謹作

古詩一首略去聲律意蓋有在也伏幸采攬

城頭皂幟作雲飛城中不縱征馬嘶虎狼那顧百萬衆
政期生載人傑歸天王遣公如召虎諸蕃列拜聽奇語
軍中相慶得左車

闕

混天宇先生一笑凜長虹

此膝那屈

闕

忠如魯公

毡帳歸來眦欲裂北極紫微汪洋血更欲結草報君王
夜半無人徑自絕城門初開聞計書參騫往哭萬人俱
義色忠軀略不變忠言凜凜在襟裾當時中國滿朱紫

不臣女真即臣楚聞公高節端不回身雖無恙氣先死
英風吹到新冕旒天恩夜破九泉幽佳城可葬不可沒
時有紅光上斗牛我昔從公子弟列欲報公知効公節
公騎箕尾我誰依獨上山巔采薇蕨

寄德裕縣丞

世人齷齪例卑嘶搶榆不識南冥飛邂逅逢公能可意
笑呼文舉作羣兒扁舟十日繫楊柳未忍憤然誇疾走
官長雖嗔渠不聞且覓吾徒縱詩酒笑談便覺無樊籠

勝景況復煩天公眼前突兀萬銀屋河伯欲以山為宮
期公定非噲等伍愛公高氣塞寰宇此行要須上九天
利磨千將斬張禹

再韵明復和來

男兒匹馬追風嘶朝燕暮越去如飛談笑功名在鐘鼎
卵破草折驅健兒悲吟誤學愚溪柳落筆幸無龍蛇走
詩成不直水一杯誰解金龜與換酒能言嗟我閉雕籠
九萬扶搖政屬公好震雷威養霖雨要須磨賦未央宮

遊戲詩壇整部伍筆鋒光怪橫天宇畏法請歌七月篇
惡食卑宮贊神禹

口占

白鶴一去斷消息白鶴嶺高高無極仙人望汝久不歸
珠花撩亂瑤海碧當時同伴有飛鸞雪浪掀天翻綵翼
世間千歲會重來過眼不須尋鳥跡

送李君上洞天

北風于喝萬竅號落雪紛紛燭鵠毛好向高堂護帷幙

新醪入臉殷春桃居上何為囂不顧叩尺長歌辭我去
行行逸興高白雲千里江山入芒屨問君無乃急所求
笑指南安作勝遊南安老師初不死一聞消息即歸休
嗟我平生污詩酒未能赤脚走岩竇在家自得忘家禪
託問老師印可否

戲天啟作時文

君不見晉陽作垣期自固中藏荻蒿勁菌輅知音會遇
張孟談安趙有才終一顧人生會遇自有時兩股何須

欲置雖快將好景供詩酒嗟嗟戚戚非男兒

哭施叔异

天上樓成求俊

闕

那知施侯更可憐

只向人間

闕

橫秋

豈惟落筆動驚俗政事入眼無金牛汗血共艱千里足
狂風忽已摧秀木生前萬事且置之白頭老母將焉屬
管鮑交情我最深計來一慟幾失音相思通昔不作夢
對床蟋蟀更秋吟

招成老

萬竅于喁北風烈烏雲貼地欲飛雪醉乘一葉上玻璃
忽霽陰威行夜月鳳凰山頭想大顛芒鞋竹杖弄清泉
胸中得句自春色散入草木騰雲煙安得今宵對揮麈
快然別作二歲語遙知今吾非故吾便當刻燭追風雨

送成材

伯夷自甘首陽薇商臣不戴周日月那知世人冷笑渠
却言馮道有金節紛紛過眼萬飛蚊何如閉目日飲醇

議論不從流俗變吾宗賴有謫仙人謫仙品流居第一
射策王庭恣狂直不知天上聞不聞且說奸臣俱辟易
秋風鞭馬衫授藍一官聊渡試江南羣從相從得髯尹
家學須當與劇談江南風月歸詩酒二陸相從真得友
無人肯伴枰欄狂為我喚回脫帽張

避賊引

羽檄星馳暴客起西望烟烽無百里夜半驚呼得漁舸
老稚相携三百指雙屈蛇盤破蓬底忽欲塞身風刮耳

沙汀艤岸少依劉萬斛愁情空一洗迴思當年侍玉皇
禁垣夜直宮漏長驅馳誰謂遽如許客枕不安雲水鄉
前日蹇驢衝火烈今此扁舟壑殘雪隆暑初寒欲少休
鉦鼓逼人如地裂草廬安得無卧龍奉天政賴陸宣公
憑誰急呼人傑起使我叩角歌堯風

次韵師臯

平生論兵輕白起端欲採芝追角里誰遣聲名到人間
後後十年空血指天狗墮地嗟未已雷聲屢迫君王耳

閩山今復暗旌旗四望長安淚如洗羨君好古慕羲皇
品流不減劉真長舍我悵得甘寢傍徨忽在無何鄉
安得當陽如火烈坐令此輩消春雪六合內外還桑田
乾坤不容異姓裂看君躍馬如遊龍醉中脫帽造王公
高堂請志中興事吉甫作頌穆清風

聚星行

昂星下天扶漢德長庚乃向開元謫光芒相照數百年
一尊不得聞風月何如今日出城闐高堂共享無邊春

風流皆右煙霞表不數當年荀與陳江湖我今方卷舌
君等上天環北極箕斗虛名不必多要斥旄頭作頑石
寄李狀元

渡頭送君泛小舟絲絲細雨織寒愁自聞君來天亦喜
急掃陰霾霽九州聚星高會古難續也欲從君勤秉燭
期君指顧蘇甌閩一笑春風不忍獨

送張巨源

我頃天上遭雷斥萬里歸來弄泉石慙愧張侯著眼看

詩卷光芒射奎壁一朝逸氣見眉間浩歌依劉出閩山
渠今得客君得主寧復回首更悲酸陰雨初生腐草翼
破闇行空夜的皦何時歸伴柝櫓狂一吐長虹貫白日

送呂友善

火雲燒空汗如雨江北江南俱豺虎君侯不顧礪山幽
鞭馬一朝去莫禦挽君少俟秋風清君言倚門有雙親
千里歸來綵衣舞死生不計萬鍾輕過眼紛紛青與紫
顛倒重輕真可鄙憑君上天整乾坤自古忠臣多孝子

黃楊岩

石壁巉岩驚鬼劃異草幽花鎖春色羣山迤邐不能高
突兀獨磨霄漢碧芒鞋千尺上崔嵬手摘星辰脚底雷
撥破烟雲得洞戶醉眼恐是天門開入門嵯峨在紫玉
天風吹面天香馥華裾關醪揮麈尾萬指未充空洞腹
我因避地訪名山扁舟夜渡沙溪寒辛勤博此一笑喜
太平猶在水雲間猛將今無三角虎狐狸晝號鰕鱖舞
靈岩知有老龍藏挽出人間作霖雨

電

黑雲黻山山欲頽阿香推車振不開廣寒宮中珠徑寸
狂風傾下九天來高堂砰轟倒四壁萬瓦飛空如轉石
燈火青熒不敢明世間誰有胆三尺年來蠢動敢爭豪
鰕鱖起舞狐狸嘯一振天威百怪息夜半雲收北極高

枰檯集卷七